



Australian Government
Australian Signals Directorate

ASD AUSTRALIAN
SIGNALS
DIRECTORATE
ACSC Australian
Cyber Security
Centre



OLSEM WANEM BLONG YUSUM INTANET LONG SIKIUA WEI

WAN GAED BLONG OL OLFALA

cyber.gov.au

Introdaksen

Taem yu ko onlaen hem i letem yu kip in taj wetem ol fren mo famli, lanem abaot ol topik mo iven plei ol gem.

Semak olsem we yu putum sitbelt blong yu bifo yu draev, yu mas tekem ol step bifo yu yusum intanet blong yu moa sikiua.

Australian Cyber Security Centre (ACSC) i wantem mekem sua se evriwan hem i sikiua taem oli stap onlaen. Dokumen ia i kavremap sam besik saeba sikiuriti praktis we yu save yusum blong protektem yuwan taem yu aksesem intanet.



Australian Cyber Security Centre (ACSC) olsem pat blong Australian Signals Directorate (ASD), hem i provaedem advaes, asistens mo opereisenal rispons blong priventem, ditektem mo provaedem solusen long ol saeba tret akensem Ostrelia. ACSC hem i stap blong help mekem Ostrelia i mos sikiua ples blong konek onlaen.
Blong moa saeba sikiuriti infomeisen, ol gaed mo advaes visitim cyber.gov.au

Saeba Sikiuriti blong ol Sinia



Advaes 1: Apdeitem divaes blong yu.

Taem yu apdeitem sofwea blong yu hem i olsem we yu tekem trak blong yu long sevis. Hem i impruvum pefomens blong divaes blong yu mo mekem hem i moa sikiua.


Ol saebakriminel oli stap faenem ol niu wei blong hak i ko insaed long ol divaes. Taem yu setemap divaes blong yu blong otomatikli instolem ol apdeit hem i save fiksni eni wiknes insaed long sofwea blong yu mo kipim aot ol haka.

Blong faenem moa infomeisen, lukaot 'Updates' long on cyber.gov.au



YU SAVE SE:

Ol apdeit oli save adem tu ol niu fija i ko long divaes blong yu mo mekem hem i ran kwik moa.



Advaes 2: Tanem on multi-fakta otentifikeisen

Multi-fakta otentifikeisen long akaon blong yu hem i wok semak olsem wanem we wan sikiuriti skrin hem i mekem long hom blong yu. Hem i protektem yu long ol kriminel we oli stap traem blong brekin.

Taem yu aktiveitem multi-fakta otentifikeisen, yu nid blong kivim ol maltipol pis blong infomeisen blong aksesem akaon blong yu. Eksampol, maet bae yu nid blong entarem paswod blong yu mo wan teks mesej kod blong lokin long sosol media profael blong yu.

Ol maltipol leia oli mekem i moa had blong ol saebakriminel blong hakem. Maet bae oli save manej blong wokemaot wan pat, olsem paswod blong yu, be bae oli stil nid blong kasem ol narafala pis blong pasel blong aksesem akaon blong yu.

Blong faenem moa infomeisen, lukaotem 'Multi-factor authentication' o 'MFA' long [cyber.gov.au](https://www.cyber.gov.au)



RIMEMBA:

Sipos yu nidim help blong tanem on multi-fakta otentifikeisen, askem wan fren o famli memba blong helpem yu.


Advaes 3: Bakemap divaes blong yu

Taem we yu mekem wan 'bakap' yu stap mekem wan kopi blong ol impoten fael blong yu mo putum olketa long wan ples we i sikiua. Hem i olsem we yu fotokopi ol preses foto blong kipim long wan sef ples lukaot yu lusum ol orijinel.

Taem we yu bakemap komputa, fon o tablet blong yu, ol kopi blong ol fael blong yu oli sev i stap onlaen o long wan seperet divaes. Taem yu kat wan bakap blong ol impoten fael blong yu mo foto we yu laekem bambae i mekem se yu kat pis long maen blong yu.

Sipos wan samting i ko rong wetem divaes blong yu o ol saebakriminel oli hakem divaes blong yu, bambae i isi blong yu ristorem ol fael blong yu long ol bakap blong yu.

Blong faenem moa infomeisen, lukaotem 'Backups' long [cyber.gov.au](https://www.cyber.gov.au)



YU SAVE SE:

Taem yu bakemap divaes blong yu oltaem hem i minim se oltaem bambae yu kat akses long ol mos ap tu deit fael blong yu.


Advaes 4: Yusum wan pasfres

Sipos wan paswod i putum wan padlock long akaon blong yu, wan pasfres hem i kivim sikiuriti sistem blong hemwan! Oli ol moa strong mo oli ol vesen blong paswod we oli moa sikiua.

Taem we yu no save tanem on MFO, yusum wan pasfres blong sikiurem akaon blong yu. Ol pasfres oli yusum fo o moa random wod olsem paswod blong yu. Hemia hem i mekem i had blong ol saebakriminel oli wokemaot be hem i isi blong yu rimembarem.

Taem yu krietem wan pasfres, mekem hem i:

- **Long.** Taem hem i longwan moa, hem i moa gud. Eim se longwan blong hem bae kat 14 o moa karakta. Fo o moa random wod we bae yu rimembarem hem i gud. Eksampol, 'pepol dakdak potato bot'.
- **Man i no save wokemaot.** Taem we pasfres blong yu i had blong man i wokemaot, bambae hem i moa gud. Ol sentens oli ol gudfala pasfres, be oli moa isi blong wokemaot. Wan miks blong fo o moa random wod bambae oli mekem wan pasfres we i moa strong.
- **Yunik.** No risaeklem ol pasfres blong yu. Yusum ol difren pasfres blong ol difren akaon. Sipos yu strakel blong rimembarem evri pasfres blong yu, tingting blong yusum wan paswod maneja. Wetem wan paswod maneja, yu nidim nomo blong rimembarem wan paswod, paswod maneja hem i tekem kea long ol narafala samting. Lukaotem 'password manager' long cyber.gov.au blong moa advaes.



Lanem moa abaot hao blong krietem ol sikiua pasfres taem yu lukaotem 'Passphrases' long cyber.gov.au

Advaes 5: Rekoknaesem mo ripotem ol skam

Taem yu ripotem wan skam kwik taem, bae mifala i akt moa kwik.

Sipos yu bilivim se wan man i stap traem blong yusum intanet blong skamem yu, hem i moa gud blong yu proaktif mo lukaot bitim we yu riskim blong oli tek advantej long yu.

Sipos hem i swit we swit, maet hem i tru ia. Maet wan mesej i talem se yu bin winim wan praes o se komputa blong yu i kat wan vaeras, mesej ia i no se yu nomo yu risivim.

Maet wan skama ia i sendem i kam mo oli wantem tek advantej long yu.

Rimemba se ol skama samtaem bae oli priten se oli wan man o okanaeseisen we yu trastem. Yu tingting festaem sipos yu risivim wan mesej we i luk olsem se hem i kam long wan man we yu trastem be oli stap yusum wan niu fon namba, imel adres o sosol media profael. Bifo yu ansa kontaktem olketa tru long rod we yu save dipen long hem blong verifaem se man ia o okanaeseisen we i stap mesejem yu hem i rili man o okanaeseisen ia. Eksampol, sipos yu risivim wan teks mesej we i luk olsem se wan pikinini blong yu i sendem, be i kam long wan niu namba, yu no ansa. Sendem olketa wan mesej long sosol media blong jekem se oli rili jenjem fon namba blong olketa festaem.



YU SAVE SE:

Ol saebakriminel oli kleva mo oli save yusum wan nem mo imel adres we yu save.

Lukaot sipos:

- oli askem yu blong pem wan bil long hariap taem.
- oli askem yu blong jenjem ol ditel o paswod blong yu.
- oli askem yu blong klik long wan link o openem wan atajmen.



Konklusen

Naoia we yu ekwipem yu wetem save blong yusum intanet long wei we i moa sikiua, yu save braosem intanet wetem konfidens mo kontinu blong enjoem taem blong yu onlaen.

Rimembarem se ol saebakriminel oltaem oli stap kamap wetem ol niu wei blong taketem ol man.

I nokat samting i rong sipos yu impruvum save blong yu abaot saeba sikiuriti sam samtaem mo lanem ol niu wei blong stap sikiua.

Ol bonas advaes

Wantem lanem moa wei blong stap sikiua onlaen? Jekemaot olketa advaes ia.

Tingting abaot wanem you postem.

Tingting gud abaot infomeisen we yu sherem onlaen mo hu bae i luk. Akseptem nomo ol fren rikwes long ol man we yu save long ril laef.

Kasem ol alet abaot ol niu tret.

Saenap blong fri alet sevis blong mifala. Hemia bambae i letem yu save taem mifala i faenem wan niu saeba tret.

Hemia bambae i kivim advaes tu long yu abaot wanem blong mekem sipos wan atak i hapen.

Tokbaot saeba sikiuriti wetem ol famli mo ol fren.

Naoia we yu kasem moa save finis abaot saeba sikiuriti, sherem wanem we yu lanem wetem ol famli mo ol fren blong yu. Save blong yu bae i save helpem olketa aot long wan triki situeisen long fiuja!


No yusum pablik Wi-Fi taem yu mekem onlaen banking o shopping.

Pablik Wi-Fi hem i gud tumas blong yu wajem ol video o ridim ol websaet be kipim eni onlaen aktiviti we i involvem mani long hom intanet koneksen blong yu. Taem yu yusum pablik Wi-Fi yu save putum yuwan long denja.

Ripotem ol saeba kraem mo ol insiden blong kipim Ostrelia i sikiua.

Sipos yu ting se yu bin wan viktim blong wan saebakraem, akt kwiktaem. Moa advaes i stap long cyber.gov.au

Saeba sikiuriti kroswod



DAON

- 1. Connected to the internet
- 2. A strong password
- 3. A person who uses computers to steal data
- 8. Software that destroys viruses
- 9. A deceptive scheme or trick
- 12. A copy of your computer's files
- 13. Relating to, or involving computers

KROS

- 4. Wireless networking technology
- 5. Australia's lead agency for cyber security
- 6. A document on the World Wide Web
- 7. To give information about something
- 10. New, improved or more secure versions of software
- 11. Electronic mail
- 14. The state of being free from danger or threat
- 15. A tool that can connect to the internet

Disklema

Infomeisen insaed long gaed ia hem i jenerol infomeisen mo i no blong man i tekem olsem likol advaes o blong man i dipen long hem blong helpem hem long eni situeisen o imejensi situeisen. Long eni impoten isu, yu mas lukaotem stret indipenden profesenal advaes we i rilet long situeisen blong yu.

The Commonwealth hem i no akseptem eni risponsibiliti o laeabiliti blong eni damej, los o ekspens we wan man i kasem from se hem i dipen long infomeisen we i stap insaed long gaed ia.

Kopiraet

© Commonwealth of Australia 2023

Evri materiel we oli presentem insaed long pabliseisen ia hem i anda long wan Creative Commons Attribution International licence (www.creativecommons.org/licenses) eksep Coat of Arms mo eksep we oli talem se hem i anda wan difren samting.

Blong mekem se i nokat daot, hemia hem i minim se laesens ia hem i aplae nomo long materiel olsem we oli setemaot insaed long dokumen ia.



Ol ditel blong releven laesens kondisen oli stap long Creative Commons websaet semak wetem ful likol kod blong CC BY 4.0 laesens (www.creativecommons.org/licenses).

Yus blong Coat of Arms

Ditel blong ol kondisen we man i mas folem blong yusum Coat of Arms hem i stap long websaet blong Department of the Prime Minister and Cabinet (www.pmc.gov.au/government/commonwealth-coat-arms).

Blong kasem moa infomeisen, o blong ripotem wan saeba sikiuriti insiden, kontaktem mifala:

cyber.gov.au | 1300 CYBER1 (1300 292 371)

Namba ia man i save kolek nomo taem i stap long Ostrelia.